

ԳԱՐԵԳԻՆ ՀՈՎՍԵՓՅԱՆԻ ԱՆՏԻՊ ՆԱՄԱԿՆԵՐԻՑ

1991 թվականին Մատենադարանին հանձնվեց ակադեմիկոս Ստեփան Մալխասյանի անձնական արխիվը:

Կարգավորման աշխատանքների ընթացքում հարյուրավոր նամակների միջից հայտնարարվեցին նաև նշանավոր հոգևորական, մեծ հայագետ Գարեգին Հովսեփյանի անտիպ նամակները՝ հասցեագրված Ստ. Մալխասյանին:

Ընթերցողների ուշադրությանն ենք ներկայացնում եղած նամակներից չորսը: Դրանք վերաբերում են Բրիստոնեռքյան ընդունման 1600 և Գրեթի գյուտի 1500-ամյակների նշման առթիվ կատարվելիք աշխատանքներին:

«Մեծ տոնի հիշատակին» /1600-ամյակի առթիվ/ մեծ նախաձեռնությունն իրականացրեցին նմարանի սաները: Գ. Հովսեփյանի գլխավորությամբ ձեռնարկվեց հորելյանին նվիրված գիտական ժողովածուի հրատարակման գործը, որին մասնակցեցին նշանավոր հայագետներ Լ. Մանանդյանը, Մ. Արեղյանը, Գ. Տեր-Մկրտչյանը, Ս. Կանայանը և ուրիշներ:

«Իմ ցանկութիւնն է, որքան կարելի է որակութեամբ և քանակութեամբ հարուստ մի ժողովածու հրատարակել, որ իւր արտաքին շփեղութեամբ և ներքին բովանդակութեամբ տօնի մեծութեան պատշան լինի», գրում է Գարեգին Հովսեփյանը Ստ. Մալխասյանին և խնդրում նրան քանասիրական կամ լեզվաբանական մի հոդվածով կամ ուսումնասիրությամբ իր մասնակցությունը բերել հրատարակելիք ժողովածուին:

Գրեթի գյուտի 1500-ամյակի առթիվ, համաձայն Կաթողիկոսի կոնդակի, կազմվեց խմբագրական մի հանձնախումբ, որը պիտի ֆննական հրատարակությամբ լույս ընծայեր «Պատմագիրք Հայոց» հայ դասական պատմագրության մատենաշարը:

Խմբագրական հանձնաժողովի նախագահ Ստ. Մալխասյանը դիմում է Գ. Հովսեփյանին՝ առաջարկելով նրան աշխատակցել հրատարակելիք մատենաշարի աշխատանքներին: Ողջունելով «ձեռնարկութեան առիթն ու բարի նպատակը», Գ. Հովսեփյանը տալիս է իր համաձայնությունը՝ հայտնելով, որ թարգմանության համար կրնտրի Սեբեոսին:

Ձեռնարկված «Պատմագիրք Հայոց» մատենաշարի հրատարակման գործը դժբախտաբար կիսատ մնաց: Լույս տեսան միայն երեք հատոր /1904 թ./՝ Ղազար Փարպեցին՝ Գ. Տեր-Մկրտչյանի և Ստ. Մալխասյանի, 1909 թ./՝ Ագաթանգեղոսը՝ Գ. Տեր-Մկրտչյանի և Ս. Կանայանի, և 1913 թ./՝ Մ. Խորենացին՝ Մ. Արեղյանի և Ս. Հարությունյանի աշխատասիրությամբ/:

ԳՈՀԱՐ ՂԱԶԱՐԹԱՆ

25 նոյեմբ. 1900 թ.

Ս. Էջմիածին

Յարգելի պարոն

Ս. Մալխասեան,

Անշուշտ կ'յիշէի, որ իմ Տփսիսում եղած ժամանակ առիթ ունեցայ Ձեզ հետ խօսելու այն գիտական ժողովածուի մասին, որ նմաբանի սաներս մտադիր էինք հրատարակելու ի յիշատակ նմաբանի 25 ամեակի: Ձեր մասնակցութիւնն ևս խնդրեցի և Դուք սիրով խոստացաք ներսիսեան դպրոցի յորելեանի համար պատրաստած գիտական ճառը յարմարեցնել մեր ժողովածուին: Արդ այսու խնդրում եմ, եթէ պատրաստ է Ձեր աշխատութիւնը, հանէիք ուղարկել ինձ, որպէսզի բոլոր գրութիւնները կարգի բերելուց յետոյ՝ ցենզորական վարչութեան ուղարկեմ տպագրելու իրաւունք ստանալու:

Հիւանդութեանս պատճառով գործն ուշացաւ, բայց «լաւ է ուշ, քան երբեք»: Յոյս ունիմ, որ փոքր ինչ հայագիտութեան համար արժէի ունեցող ժողովածու կ'ունենանք:

Յարգանքով ողջունում է

Ձեր խ. Գարեգին վրդ. Յովսէփեան

Յ. Գ. եթէ Ձեր աշխատութիւնը դեռևս բոլորովին պատրաստ չէ, հանեցէի խնդրեմ երկտողով յայտնել, թէ ե՞րբ կարող կ'լինիք ուղարկել:

Նոյն

Յարգելի պ. Մալխասեան,

Ձեր պատուական նամակն ստացայ. բայց իսկոյն չ'պատասխանեցի, որովհետև այնքան շտապողական չէր: Ձեր ընտրած ծրագիրն ինքնըստիմեան հետաքրքրական է, ուրախութեամբ կ'հիւրընկալուի Ձեր յօդուածը, որքան էլ երկար լինի: Յոյս ունիմ, որ այժմ արդէն սկսած կ'լինիք, ինչպէս յայտնել էիք Ձեր նամակի մէջ:

Կարիք չկայ, որ յօդուածը Դուք ներկայացնէք ցենզուրին: Այստեղ ամբողջը միասին կ'ուղարկեմ:

Յարգանքով ողջունում է

Ձեր խ. Գարեգին վրդ. Յովսէփեան

21 յուն. 1901 թ.

Ս. Էջմիածին



Յարգելի պ. Մալխասեան,

Երևի Դուք շատ ուրախացաք, որ ինձ հշեցին Տփսիսից, որովհետև մեր գրական երեկոյթի համար դասախօսութիւն պատրաստելուց և կարդալուց ազատուեցաք: Սակայն սխալուած էք, հեշտ կերպով Ձեզ հանգիստ չեմ թողնի, մի դասախօսութիւն ասեմ, թե շարադրութիւն պարտական էք ինձ և ահա սոյն երկտողով Ձեր դուռն եմ բխում պարտքս հատուցանել տալու:

Անշուշտ չէք մոռացել մեր ժողովածուի խնդիրը. այժմ յարութիւն է առել այն աւելի ընդարձակ ծրագրով: Շուտով լրանում է Ս. Էջմիածնի 1600 ամեակը. Մայր Աթոռի ճեմարանի սաները ծրագրուած ժողովածուն նուէր պիտի բերեն մեծ տօնի յիշատակին: Այսպիսով նախկին շարժառիթը միանում է ներկայ տօնի հետ: Ահա այս նպատակի համար եմ Ձեզ դիմում և խնդրում բանասիրական կամ լեզուաբանական մի յօդուածով կամ ուսումնասիրութեամբ Ձեր աջակցութիւնը: Մաւալը կարող է մէկից մինչև երեք տպագրական թերթ լինել: Իմ ցանկութիւնն է, որքան կարելի է, որակութեամբ և քանակութեամբ հարուստ մի ժողովածու հրատարակել. որ իւր արտաքին շփեղութեամբ և ներքին բովանդակութեամբ տօնի մեծութեան պատշան լինի: Արդէն բաւականաչափ անձինք խոստացել են իրենց աշխատակցութիւնը՝ Կարապետ, Կոմիտաս և Յուսիկ վարդապետները, Գալուստ Տ. Մկրտչեան, Կ. Կոստանեան, Ս. Տիգրանեան, Մանանդեան, Մ. Արեղեան, Ս. Կանայեան, Անառեան, գրուած են և ուրիշ կարող անձանց: Յոյս ունիմ, որ հայագիտութեան բոլոր հիւղերից բաժին կ'ունենանք. հնագիտական և ազգագրական յօդուածները պատկերազարդ կ'լինեն: Կոմիտաս վարդապետը երաժշտական մի յօդուած տալուց զատ՝ ժողովրդական երգեր և լելենքեր էլ կտայ ձայնագրուած: Մի խօսքով նշաններն այնպէս են, որ յոյս ունիմ, թէ արժէք ունեցող բան դուրս գայ:

Ձեր մատենագրութեան դասերի ժամանակ գործածելու համար շուտով հնագիտական մի ալբոմ կ'ուղարկեմ 20 պատկերներով, որոնք հայոց գրի փոփոխութիւնների մասին մեկին գաղափար են տալիս: Իւրաքանչիւր պատկերի տակ գրուած կ'լինի գրութեան թուականը, գրչի անունը և այն պարագաները, որոնք անհրաժեշտ են: Կարծեմ օգտակար կ'լինի այս գործը ներսիսեան դպրանոցի համար. հնագրութեան պատմութիւնը ապագային եմ թողնում, երբ ձեռքիս տակ եղած գործերը կ'վերջացնեմ:

Յարգանքով Ձեր խ. աղօթարար
Գարեգին վրդ. Յովսէփեան

28 սեպտ. 1902 թ.
Ճեմարանի տօնին
Ս. Էջմիածին

Յարգելի պարոն Մալխասեան.

Հոկտ/եմբեր/ 5-ին գրած Ձեր պատուական նամակն ստացայ. շնորհակալ եմ նախ Ձեր բարեկամական խօսքերի և ապա այն պատուի համար, որ անում էք ինձ՝ առաջարկելով աշխատակցել տառերի գիտի 1500 ամեակի առթիւ Ձեր հրատարակելիք գործին, որին ի սրտէ յաջողութիւն եմ ցանկանում:

Շատ գովելի է Ձեր մտադրութիւնը. մեր նախնեաց մատենագրութիւնն ու պատմութիւնը այլ ևս գրաքար լեզուով մտաշելի չէ նոյն իսկ կրթութեան դասակարգին, իսկ ներկայ սերունդը հետաքրքրել անցեալով մեր գոյութեան պահպանութեան էական պայմաններէ մէկն է: Ի նկատի ունենալով Ձեր ձեռնարկութեան առիթն ու բարի նպատակը սիրով կ'կամենայի աջակից լինել. հեթադրելով, որ ամենաքիչը 1 1/2 տարի ժամանակ կ'տա: Այս վերջին հանգամանքն ինձ համար կարևոր նշանակութիւն ունի, որովհետև մինչև միւս սեպտեմբեր հաւանօրէն լի ու լի աշխատանք կ'ունենամ և անկարող կ'լինիմ ուրիշ գործի ձեռք տալ: Համաձայնութեան դէպքում կ'կամենայի Սեբէոսն ընտրել թարգմանութեան համար. այդ հեղինակն ինձ հետաքրքրում է և ուրիշ տեսակէտով, այն ժամանակը, որ պէտք է գործադրեմ ժամանակագրութիւնն ու պատմական նկարագրութիւնն ստուգելու, օգտակար կ'լինէր և ապագայի համար ծրագրուած աշխատութեան համար: Աշխատութեան համար նշանակուելիք վարձատրութիւնն ինձ համար երկրորդական է. եթէ դրամի սղութիւն կ'ունենամ, կարող էք իմ վարձատրութեան մասին չ'մտածել, երևի այն ժամանակ ևս մի կտոր հաց կ'ունենամ ուտելու իբրև վարդապետ, ինչպէս և այժմ, աւելի ցանկալին ծրագրուած բարի ձեռնարկութեան յաջողութիւնն է:

Մինչև այստեղ, երևի, գոհութեամբ կ'կարդաք նամակս և կ'մտածէք. «Լաւ էր, հեշտութեամբ ստացանք Գ. Վ. - ի համաձայնութիւնը»: Սակայն ... սպասեցէք: Առանց կաշառքի կատարուած գործերը չեն գնահատուում մեր երկրում, իսկ ես կ'կամենայի, որ իմ համաձայնութիւնը շատ թանգ գնահատուէր: Թախանձագին խնդրելով՝ մի մեծ նուէր կ'կամենայի ստանալ Ձեզանից, և այդ նուէրը կ'լինէր Ձեր աշխատակցութիւնը մեր ժողովածուին, եթէ ոչ մեծ ուսումնասիրութեամբ, գոնէ լեզուաբանական կամ բանասիրական մի յօդուածով: Հաշտուել չեմ կարող այն մտքի հետ, որ Դուք մասնակից չ'լինեք նեմարանականների հրատարակութեան: Յուսով եմ, որքան էլ ծանրաբեռնուած լինիք, մի հնար կ'գտնէք խնդիրքս կատարելու:

Սիրալիք ողջոյններով և յարգանքով

Ձեր խ/ոնարհ/ աղօթարար

Գարեգին վարդ. Յովսէփեան

10 հոկտ/եմբեր/ 1902 թ.

Ս. Էջմիածին

Յ. Գ. Այս շաբաթ չկարողացայ հնագրական արքումը պատրաստել Ն/երսիսեան/ դպրոց ուղարկելու համար. յուսամ միւս շաբաթ կարող կ'լինեմ: Այդ գործն ուսումնասիրութեամբ հանդերձ պէտք է նուիրուի տառերի գիտի յիշատակին:

Նոյն